

呼倫貝爾志略

三

邊務
外交

一〇〇
二四

呼倫貝爾志略

第參冊

邊務

自來籌邊事者不外移民墾殖屯兵戍守二端呼倫貝爾游牧成風草萊未闢邊線綿遠堡障必嚴安內禦外在在胥資擘畫以境界言西南兩方接喀部車臣汗西北一帶與俄羅斯為鄰三面介在邊陲均為衝要地點而以邊患言喀部在清初已傾心內屬列為外藩今更五族融洽疆域相安向無侵擾呼倫貝爾之最重邊防實惟額爾古訥河一千五百里之天然界限攷額爾古訥河一水中流為中俄國界所由分而中國最初之國界原不僅止於額爾古訥河自康熙二十八年締結尼布楚條約以外興安嶺額爾古訥河格爾畢齊河為兩國國界舉額爾古訥河西北一帶土地

輕以畀敵詳見外交中國界務在江省西北者於是劃分而呼倫貝爾

之邊防亦即於是開始經營在未設副都統之先初歸黑龍江將

軍管轄定察邊之制於中俄分界處歲以五六月間派齊齊哈爾

墨爾根黑龍江協領各一員佐領驍騎校各二員共兵二千四百

名分三路至格爾畢齊額爾古訥莫里勒克在額爾古訥河右岸現設卡倫楚爾

海圖即粗魯海圖河在巴圖爾和碩卡倫對岸今屬俄境等河巡視有無收痕以防侵越碑

界察邊卓帳處齊齊哈爾在格爾畢齊額爾古訥二河墨爾根在莫

里勒克河黑龍江在楚爾海圖河定例每齊齊哈爾協領與墨爾

根協領會墨爾根協領與黑龍江協領會各書姓名年月於木牌

瘞山上明年察邊者取歸呈將軍副都統復各瘞木牌以備後來

考驗

其時行程漫無轍迹擇大樹去皮識之以認歸路或就地理之隆土作冢形餼根不能携則囊掛樹上以寄之

至雍

正十年始設副都統專員由布特哈阿爾太車臣汗等處先後撥來

索倫達呼爾巴爾虎額魯特新巴爾虎各旗兵丁六千五百名分

牧駐防歸副都統輪派官兵戍守其佈防界線及支配方法喀部

車臣汗界先後設十九卡每二卡官一員兵十名每月一換東路

布特哈界之六卡每卡兵五名共官一員兩月換防沿邊防俄則

根據恰克圖條約初設十二卡倫

陸界三卡水界九卡

總卡官一員分卡官

各一員兵各三十名防期三月一換兩卡聞設一鄂博逐日巡查

俄人越界牧壑情事繼以卡防單薄重設內卡十五處藉壯聲援

乾隆五年復增設總卡官一佐領二蒙古包四十八

每卡四包咸豐七

年以內外卡倫相距寫遠

一二百里不等

呼應不靈移內就外相距三四

十里以便接近光緒十年為防俄人越界採金復於額爾古訥河

下流增設五卡此清室歷代防邊之大較也在昔經制之初寓兵

於牧既宏休養生息之圖復合勞逸平均之道非不意美法良無

如承平日久故事敷衍沿邊卡務餉少兵單甚至士呼庚癸鼻息

仰人俄人利用我飢餒士卒施之以一飽之惠即甘為守牧牛羊

之隸役邊務至斯不堪言狀至光緒二十六年庚子一役沿邊卡

倫盡毀於俄迨三十三年蘇副都統重設十一卡倫期復舊制

下流

各卡時尚闕如

三十四年護副都統宋小濂蒞任慨邊務廢弛倣古屯田

遺制為實邊政策以蒙人不習耕稼一律改用漢人增設至二十

一卡每卡弁一員兵二十二名五卡設一卡官十卡設一總卡官以耕為成分給牛馬各項墾資經此一番整頓越墾土地漸次收回伐木刈草皆知斂迹商賈聞風而來農民日漸坴聚從茲一意進行不難漸臻充實乃至辛亥民國告成蒙旗被煽獨立漢官退讓兵匪紛起卡制大擾其時珠爾干河總卡官趙春芳與額勒和哈達卡官李玉琛招撫叛兵編練馬步隊保護奇漠兩金廠支持下遊殘局奇永額三卡賴以未陷至民國九年俄黨內訌蒙旗以種族大義幡然內附請命中央取消自治一時復設有漢蒙各官沿邊縣沿海滿兩半分屯重兵兩旅而呼倫一隅至是重放光明曆考呼倫貝爾邊務情形在光緒三十三年以前純取游牧備兵

主義光緒三十三年以後改用屯田實邊主義因時制宜均屬籌邊善策徒以法久弊滋蒙兵輪戍之制幾同虛設兼之外侮內亂事變迭乘經庚子辛亥兩役邊局殘破幾有不可收拾之狀民國十年善後督辦鍾毓規復邊防重設十八卡倫每卡官一員兵十餘名以沿邊三縣知事兼充三總卡官邊卡制度漸復舊觀廷恆繼任鑒於前人經畫參酌目前局勢就沿邊三縣十八卡撥地招墾減緩租賦以符固圉實邊之計畫並於河塢要隘移駐警官三員警士五十名資鎮戍焉而額爾古訥河下游各縣電報電話亦於同時籌設節節進行力謀發展惟是國防所在水陸地帶衝要繁多起視額爾古訥河兩岸彼則村屯蟻聚我則汎地星疏滿洲

里一準彼則路線橫穿我則形勢莫扼况乎自珠爾干河以下山
嶺險峻道路急待開通海拉爾河以北土質膏腴樹藝更須興作
又均為籌邊務者不容置諸緩圖者乎

附錄宋小濂籌邊條陳

欽帥
大帥 鈞座敬稟者

職道

能薄識寡政畧未嫻猥蒙憲台知遇奏

護呼倫貝爾副都統深懼弗克勝任上負朝廷眷念邊陲憲台
委任責成之至意到任以來業將大概情形暨添設各局處章
程分別稟呈在案嗣於逐日接見官商詳加諮訪並證以平素
之所見聞於地方形勢蒙旗情狀似已得其要領未嘗不喟然
於經營之未免過晚而又慄然於更張之不敢過驟也查呼倫

貝爾雖係江省轄境然興安一嶺橫絕其東儼有天然甌脫之
勢而又西北東三面與俄國接壤西南與各蒙為鄰鐵軌貫穿
腹地間道直達京師邊防之重莫重於此庚子變後外人乘機
進取不遺餘力而所屬各蒙旗猶渾渾噩噩純在游牧時代語
以大局懵然罔知猶頑癡然搔之不癢割之不痛故近數年來
權利放棄殆盡若輩尚處之晏然談邊畧者怵於時局之危多
謂非銳意經營極力改革如裁撤旗官駐紮新軍設官招民大
興屯墾以及學堂實業各新政均一一毅然實行弗稍遷就恐
不足以固我邊圉洎彼覬覦夫論者誠是矣然愚以為理無或
易勢有難行竊慮夫百廢俱興無論需款浩繁一時無從羅掘

而張皇過甚易招強隣之忌變更太驟或失蒙旗之心此貳彼
虞兩相勾結恐我之政策未行而邊事已不堪問矣為今之計
莫若通盤籌畫預定辦事宗旨以備逐漸興革固不敢因循以
誤事亦不必急遽以求功惟當分別緩急擇要切實作去徐圖
進步冀收得寸得尺之效則邊務庶有勞乎茲將豫籌各事辦
法開列於左一旗務查呼倫貝爾所屬各蒙旗計口三萬有餘
人情樸厚牧畜蕃滋且皆節儉耐勞奉法維謹前職道到任時
奉宣德意不過數言官兵皆同聲感激若能開誠布公逐漸開
導尚能為國效用屏蔽邊疆但僻處荒野風氣銅塞習慣所結
開化驟難倘操之過激各蒙疑懼生心轉於事機有碍非加意

安撫不易為力顧安蒙之道有二一副都統以下等官暫勿裁
改查本屬各蒙旗係新舊巴爾虎達呼里索倫額魯特各種部
落錯居雜處較扎賚特郭爾羅斯杜爾伯特各蒙之祇係一族
又有壬公貝子為之鎮攝及各城滿漢旗人之漸開化者迥乎
不同全資副都統總副管以下各官層遞管轄而各蒙旗心目
之中又祇知有副都統故二百年來極為帖服本年春間憲台
奏定東三省官制內有裁撤各城副都統一條原以既建行省
自應添設民官惟此間現在無民可治熟察情勢尚非其時裁
減額兵各蒙官已有連累而及之懼似應將不即裁改之意早
日決定宣布以安其心況蒙官均屬半俸國家歲費無幾又何

惜此虛名不暫留以資維繫耶一舊有職務與現行各事須盡分
辦理緣各蒙旗狃於故常於新政不知所謂若驟令其革故從
新必非所願 職道 前請另設文案會計調查審判各局處即為
別立行政機關振興一切其副都統衙門及各旗向日例行如
官府文書司員差事徵收稅務民間習尚等事一切暫仍其舊
但於事之有弊者逐加整頓迨新治推廣濡染既深然後隨時
變通以歸一致 職道 非敢依違兩可特以邊務闕繫重要此無
侵擾彼無阻抗乃可安心布置放手作去也一邊務查呼倫貝
爾轄境三面隣俄沿邊一千餘里西北自塔爾巴幹達呼山起
東北至額爾古訥河口止一望荒涼幾同無人之境俄境則屯

鎮相望星羅棋布庚子變後彼族乘勢侵越如採礪開壑捕獵
暨取水植羊草等事一皆聽其所為無人過問近雖漢礪收回
而邊境空虛如故所失仍屬不少然必遷民實邊或大興屯墾
則又需費甚鉅財力實有未遑規時度勢惟有畧仿屯墾之意
先從小處切實辦起立定基礎徐求擴充其辦法仍由卡倫入
手查沿邊舊有卡倫經亂廢置上年前任蘇副都統復設十一
處每卡蒙兵數名餉薄兵單異常困苦不惟不能守邊且恐藉
以盜賣草本為俄人利用現擬變通辦理每四十里設一卡倫
每卡設卡弁一名卡兵三十名每五卡設卡官一員每十卡設
總卡官一員再於扼要處所酌設地方官節制各卡官弁主持

一切行政事宜其各卡弁兵均須招集安分農民每卡以十名
巡查邊境二十名開墾荒田更番輪替暇則練兵習操俾力農
講武兩俱不廢所得糧米即作各該卡兵津貼俟其力能自給
即將所墾之地分給為業酌量升科停餉其卡弁即改為屯官
另行招兵駐卡逐漸更換庶邊民日漸繁庶至沿邊出產如羊
草木植皮張等類或由卡兵自行採伐售給俄人定章收稅或
定地發照由俄人採伐但收稅課沿邊全礦最多應由守卡官
弁及地方官隨時查勘有則開辦俾無遺利且利之所在人必
爭趨即可藉以多聚人民然交通不便辦理仍多窒碍或提官
款或招商股設立應籌輪船公司駛行黑龍江額爾古訥河等

處以資運輸既有觀音山漠河等金廠應用糧貨之多當不望
其虧本冬令則仿俄站辦法令各卡均備快馬冰撬以傳遞公
文便利行旅夫卡與卡近則照料易周即可開通道路逐漸招
徠墾戶即有卡兵保護又有已耕之田食糧居處後至者不至
缺乏族戚滋引來者必多較之驟遷多數人民倉猝到邊安插
不易似為得法且夏有輪船冬有冰撬則交通便利自不難日
漸繁昌徵收羊草皮張稅課廣開金礦則籌款有資於行政各
費不無小補如此循序辦起邊境可望日充藩籬可期漸固如
能多撥巨款將全省邊務照此統一辦理尤為妥善

職道

前曾

草擬邊務節略上呈諒蒙鑒納蓋江省應辦事務雖多總應先

從邊務作起得紓後顧之憂乃能將一切內治次第推行以上各節均係大概辦法其詳細章程俟派員分路調查明確繪圖貼說再行分別酌訂呈請鑒核一墾務查呼倫貝爾地方廣袤一望荒蕪可墾之地所在皆是祇以蒙人不知耕作一米一粒由千里外購運而來道遠費重何可以常沿邊既設卡倫略仿屯墾之法逐漸開闢腹地亦應招墾以盡地力惟蒙旗夙以牧畜為業其據所游牧之地未便即行開放致有侵擾應用耕牧並興之法將沿鐵路兩旁各三四十里擇腴招放既於牧場無碍而往來捷便領戶亦易招徠但年來墾務已成弩末如杜爾伯特墨爾根等處地近省城領戶尚不踴躍況此天寒地遠孰

肯捨易就難非變通辦理難以收效擬本屬各處荒地均不收押荒銀兩俟其墾闢成熟再行照章收科並擬酌定獎章如有能招墾戶若干或設墾務公司若干者參仿墾務收款部章分別異常尋常請獎以示鼓勵蓋能為國家招墾實邊其功亦不在放荒各員下也再能籌撥巨款開設墾牧銀行專為墊辦墾戶牛種房井各項並振興牧政之用則發達尤為較易其辦法章程俟查看詳訂呈請核奪似此辦理負未受塵之氓當能源源而至數年而後地方漸臻繁盛蒙漢雜處觀感有資游牧之民當進而為耕稼之民也一外交查本處外逼強鄰中貫東清鐵路加以滿洲里及海拉爾兩處業經宣布自開商埠交涉極

為繁難原有交涉稅務局專理外交兼辦新添各稅仍飭照常
辦事惟局務章程尚須參酌改訂其滿洲里海拉爾博克圖鐵
路交涉分局原隸哈埠總局惟於本處時有闕連請並由副都
統就近節制以便呼應靈通且既經開埠所有外人稅務應設
關道辦理則本處關稅無多然既有哈爾濱滿洲里總分各關
仍應歸副都統兼管俟設有知府同知等地方官再行責其承
辦如是則交涉不至紛歧遇事方有把握抑職道更有進者外
人交涉手段備極狡獪往往此正一意堅持彼又設法牽動聲
東擊西因應為難向來外交失著弊多生此擬請以後無論何
項交涉彼族有向省城曉舌者均由本處定辦免致入彼圈套

至於重大事件仍一面嗟商一面咨請省署主裁一設官查呼
倫貝爾所屬全係蒙旗副都統以下等官既擬暫勿裁改則本
處地方事務即可由副都統兼辦民官稍從緩設惟是邊境寥
廓鐵路橫亘既欲經營屯墾並開放沿路荒地非擇要設官不
足以專責成而繫民望查邊境應設官之處三一滿洲里一吉
拉林一額爾古訥河口鐵路兩旁應設官之處二一呼倫貝爾
一雅克石及免渡河一帶均係緊要處所萬難任其空虚但創
辦之初又未便一時並舉除吉拉林業飭卞令前往試辦額爾
古訥河口即暫由該令就近兼顧免渡河一帶俟查看情形再
行擬辦外惟滿洲里地當邊要又係東清鐵路入境首站且已

開作商埠而俄蒙往來復以該處為衝途不免時有交涉左近沿邊各卡亦須有大稽查其呼倫湖一帶魚鹽柳條等項出產甚饒並應設法經理實較各處更為重要應即設知府銜邊防同知一缺以資控制建設之始事務稀簡擬仿局所辦法同知下設文案委員一員差遣委員二員書記二名警兵十名巡防兵一哨已可敷用費欸不多而為益匪淺如可行即當擬定章程咨明辦理一民政查本處人民稀少所有地方官既擬暫緩添設而旗署各員又於吏治民事苦無所知前雖設審判局員專理詞訟案件然該員只有審判之權一切民政非其範圍所及擬將審判附入巡警局內另派專員民政司法暫為合辦俟

地方發達再行分設以符立憲政體一軍事查呼倫貝爾地當
邊要蒙旗散居原設各旗額兵業經裁撤僅持舊有巡防馬隊
一營照顧實有難周本應設駐重兵以資鎮懾無如時艱餉絀
力有未逮除沿邊卡倫另行籌辦外擬再添駐馬隊一營藉敷
分佈惟查近來防營氣習往往恃符騷擾未收勦匪之功而居
民先受其害本處全係蒙旗若另撥舊營前來或不免從前積
習致有侵擾各蒙情事轉多不便擬將此項馬隊由省城撥給
全營餉乾由本處另行招募以便參用漢蒙業經另文咨呈省
署在案緣蒙人堅忍耐苦謹樸守法且係土著闕切尤親若加
以訓練萬不至染防營舊習但全招蒙人不通漢語於行政機

闕不免隔膜故令漢蒙各半共處一營久之自當接洽情形互
換語言漢兵既不至滋擾蒙人亦藉以開通於邊境實多裨益
至蒙旗世隸軍籍本有當兵義務以現人口計之老幼男丁統
共一萬有餘即減半練兵尚可得勁旅五六千人將來餉項稍
充欲練重兵仍應酌量參用也一實業查呼倫貝爾物產雖富
然以地利未闢人工未興所有各項實業尙無萌芽而外人又
時時垂涎亟應設法振興以維權利其原有之利惟以牧畜為
大宗各旗生計均在於此與漢民之耕稼正同尤宜提倡改良
俾圖進益此外如森林礦產魚鹽羊草皮毛等物天然之產最
為饒衍擬俟派員逐一調查明確再行擬定辦法次第興辦一學

務查呼倫貝爾地當要邊國家設旗之意原係重在養兵故各
蒙旗素安樸質漢文漢語均不學習即通漢蒙文者亦屬寥寥
現當文明進步教育普及時代自應令其向學用期開化但各
旗穹廬游牧遷徙無常家塾黨庠無所附麗應先從本城辦起
現設小學堂一所諭令各旗子弟相率入學其教法以滿蒙漢
為主求能操漢語通漢文即為及格至於普通科學不求完備
精深祇略知大義不至迷於嚮往惟體操一門最應注重兵式
並應編輯粗淺兵學教科書於第三學年內添入教授以冀造
成軍人資格既與蒙人性質相近亦與國家邊防初意相同其
有姿資聰穎勤奮向學者隨時挑送省城學堂俾與滿漢學生



一律投課藉圖深造一切章程俟擬定咨呈一巡警查巡警為
民政之一條行政上緊要機關欲謀地方幸福人民秩序非是
莫由自應趕緊辦理藉資進化惟屬專門學問語其精深完備
內地各省尚有未能辦到之處況乎呼倫貝爾地處邊荒更難
驟語及此除各蒙旗皆係軍籍人多習於當兵現在牧地安靜
頗足自衛四鄉巡警暫應勿庸籌辦外但於本城街市設局招
練警兵五六十名蒙漢各半其警章現只教以小心火燭清理
街道禁止賭博解散爭鬥稽查匪類查拿盜賊各事以便易記
易行俟此數條均能作到再行逐漸增練徐圖完備否則條目
太繁匪惟不能行且不能記轉有困難廢弛之虞一財政查事

務鉅細非財莫舉故欲籌辦一事必先即出入款項通盤預算
妥為部署然後乃有把握本處每歲大宗進款只有俸餉一項
然且連年欠發近復裁減額兵進項愈少雖物產饒裕而向未
舉辦及今為之亦非數年或十年以後不能收效實屬緩不濟
急就目下所得者只有牲畜稅及木植羊草魚鹽等稅數款牲
畜稅係屬舊有向歸衙門稅科司經徵以近三年收數比較計
三十一年收銀三萬六千餘兩最為多數三十二年收銀三萬
零三百餘兩次之本年正月至九月底收銀二萬三千餘兩冬
臘兩月已無大宗稅項又次之連歲以來遞見減少此後尚不
可知每年收稅官兵飯銀除本處留支公用暨解省額稅外餘

作副都統及衙門各司辦公已覺支絀萬分何能撥作別用木
植羊草魚鹽等稅係屬新設歸文涉稅務局試辦自光緒三十
一年九月開辦起至三十三年九月底止計二年共收魚鹽木
植山木稅銀二萬三千兩有奇羊草稅羗洋四千七百餘盧布
折銀三千三百兩上下共二萬六千餘兩除去該局經費銀二
萬一千五百餘兩草稅一項備支巡警兵餉所餘已屬無幾無
論辦理邊務創興實業款無所出即本處行政各費亦苦不敷
甚巨查呼倫貝爾邊綫之長地方之大關係最為緊要豈國家
不費一錢所能經營擬以後統核出入除本地進款若干抵補
外其餘不敷之款均由國家籌給俟數年後地利漸興查看情

形如果力能自給即請停撥其一切出入細類容俟查明列表
咨呈如能照第三條辦法撥款設立銀行財力稍紓尚可藉
資周轉也一事權查呼倫貝爾隔絕興安嶺外各蒙旗散處荒
野邊境尤為僻遠省城實有鞭長莫及之勢現擬設法經營似
應畀副都統以重權凡用人行政一切事宜統由副都統主持
省署但責成功不為遙制即將來新設地方各官亦暫由副都
統揀選調來本處當差熟悉情形人員咨請補署庶幾情意接
洽指臂相聯至上下應行公牘省城但由公署或各司局咨行
副都統查核辦理無庸逕札本處所屬地方暨各局處所而本
處地方官暨各局處所遇事但稟呈副都統核轉不得逕報省

城以歸統一而免牽掣

職道

非敢攬權怙勢良以邊地與腹地

性質不同腹地各道但司察吏故省署與各地方官可以通札

通稟本處副都統擔任邊疆重任負用入行政之權宜專一不

宜分歧前在省時暢論邊事憲台曾諭以開誠布公疏節濶目

此八字實自來辦理邊務者之金科玉律欽佩莫名

職道

並為

下一解釋曰委任而專責成倘蒙憲台俯念邊事艱棘假以便

宜不復繩以文法俾得勉竭駑駘藉圖展布

職道

之幸又非徒

職道之幸也以上十二條皆本處應行之事切要之端而其中

尤以邊務為首邊務未修則諸事難理譬之居家垣墉不設四

面任人出入但在室經營佈置曰吾以治家矣能乎不能但絕

徼荒涼毫無基礎蒙俗銅蔽未易開通如能寬以歲月逐漸推
行或不難收桑榆之效所可慮者職道材力不逮有其言論未
必能有其事實伏望憲台指授督飭竊願既定宗旨力効馳驅職道
為通籌邊務全局起見是否有當理合稟請憲台核示以便遵
行如蒙採擇入告早日決定尤為幸甚

外交

中外締結條約於尼布楚

俄語謂涅爾臣斯克

一役肇其端中俄交涉問題

亦即於尼布楚割棄開其漸今欲攷呼倫貝爾一隅對外之始末

自不得不遠溯交涉之發凡考尼布楚本屬中國領土

東三省紀畧載清之

疆域東至海北至尼布楚西北至貝爾湖柳邊紀

畧謂黑龍江所屬東至海西至尼布楚北至黑龍江

游

按黑龍江滿語曰薩哈連烏拉俄名阿穆爾其上源有二一在俄境出薩拜喀爾省綽功土山之北曰因戈達河即水道提綱

之昂依得河一在中國境出外蒙古喀爾喀部中肯特山東麓曰敖嫩河即元史之斡難河敖嫩河東北流入俄境薩拜喀爾省與

因戈達河會東流為石勒格河經尼布楚城南左岸納尼布楚河入省北境受西南之額爾古納河經雅克薩城南折而東南流受北

來之精奇里江又東南會混同江入吉林境

當呼倫貝爾西北地帶舊為蒙古各民族

遊牧採捕之地尼布楚考載清聖祖三十九年諭旨曰尼布楚等

處舊為中國屬土乃布拉忒烏梁海諸部落之地彼皆林居以捕

貂為業人稱為樹中人即元秘史所謂林木中百姓後俄羅斯強盛遂併吞之

己五六十餘年矣事在崇德年間以康熙三十九年庚辰上溯崇德六年辛巳恰六十年據此在額爾

古訥河國界未劃以前中國疆域實奄有尼布楚土地自十六世

紀以來俄人經營遠東蓄意蠶食當明末清初之際明崇禎十七二年清崇德四年

年略有貝加爾湖即麥加湖及庵雅臘河附近之地又數年進攫尼布

楚以為根據由是東寇雅克薩南侵額爾古訥河擾害索倫諸部

落自順治七年始垂四十年時清方有事中原不遑兼顧至康熙二十二

年始移師北征命薩布素瓦禮祜馬喇等統兵前進二十三年馬

喇奏稱羅刹即俄羅斯情形尼布楚雅克薩二處各止五六百人其得

以盤據多年者惟賴額爾古訥河口至雅克薩十餘處雅克薩至
布爾馬夫河口十餘處築室散居耕種自給因以捕貂尼布楚田
畝不登但取資納米雅兒貢賦喀爾喀巴爾虎人時販牲畜等物
至尼布楚與之交易得以生存又據由尼布楚逃回之布赫德云
納米雅爾八姓之人並我根特木爾黨內逃人亦同彼游牧根河
額爾古訥河等處臣請救喀爾喀車臣汗收其所部附近尼布楚
者兼禁止交易並敕黑龍江將軍水陸並進攻取雅克薩收其田
禾則羅刹不久自困上允其奏詔車臣汗諾爾布嚴飭所屬與絕
互市並宣諭羅刹責歸遁逃退回雅庫

俄部名亦曰
亞谷斯科

不報二十四

年二十五年迭命都統彭春將軍薩布素兩次用兵雅克薩毀其

木城擒獲俘虜貽書俄帝述其歷年寇邊之曲約以收回亂民劃
界議和時俄彼得大帝弱冠登位受制異母弟無實權以統馭羣
下遠東戰事弗克應援方欲媾和清書適至俄帝利用此機遣使
覆書請罪並請先解雅克薩之圍清命薩布素退兵璦琿議和之
局遂開二十七年俄使費輝多羅至色冷格地方期清使至彼會

議清以內大臣索額圖都統公國舅佟國綱尚書厄爾尼等往主
其議並命都統郎坦率重兵偕行是役軍容甚盛合徒役計之約
二萬人索額圖奏言尼布楚本係我茂明安部游牧之所雅克薩
係達呼爾總管倍勒兒故墟非羅刹所有亦非兩國隙地也况黑

龍江最為扼要環江左右皆我屬鄂倫春奇勒兒

一名魚
皮鞋子

畢拉兒

及赫哲費雅喀等民人所居之地不盡取之邊民終不獲安臣以
為厄布楚雅克薩黑龍江上下游及通此江之一河一溪皆屬我
地不可棄之於俄羅斯又我之逃人根特木爾等三佐領及續逃
一二人悉應索還如一遵行即歸彼逃人及俘獲招撫者與之
劃疆分界貿易往來否則臣當即還不與彼議和矣上報可尋以
準部與喀部構兵道梗約俄使緩議而還二十八年俄使費耀多
羅至厄布楚請續前議清復命索額圖等前往官兵量增於前瀕
行索額圖申奏厄布楚雅克薩既係我屬地臣請仍如前議以厄
布楚為界此內諸地均歸於我聖祖諭曰今以厄布楚為界必不
與俄羅斯則彼遣使貿易無棲托之所勢難相通爾等初議時仍

當以尼布楚為界彼若懇求尼布楚可即以額爾古訥河為界及索額圖抵尼布楚俄使費耀多羅額禮克謝仍以尼布楚雅克薩為彼所擴之地固執爭辯索額圖抗議談判歷述二地舊屬中國原委斥其侵踞之非並宣諭清帝好生之德俄使氣沮於是年九月議定界約雅克薩歸我尼布楚歸俄以外興安嶺額爾古訥河為兩國國界於格爾必齊河東岸額爾古訥河南岸用漢滿蒙俄拉丁五體文字刊載條約立碑為識條文列後是役也清廷兵力方張使臣索額圖復交涉強硬加以俄廷爭權掣肘不暇東顧我師壓境不難一舉降服嚴定國界如曾紀澤左宗棠於伊犁一役收回國土無如其時昧於外勢邊隅荒徼率以甌脫視之既信其悔禍之

誠復憫其交通之困姑息遷就遂結尼布楚條約此約既結由表面言之俄人城下受盟似近屈辱然實際上則毫無損失在我徒博寬大之名而土地割讓實啟外人以窺伺之端而關於呼倫貝爾之種種交涉遂亦自此萌芽雍正五年由清郡王策凌侍郎圖理琛同俄使薩瓦夫拉梯斯拉費齊會訂恰克圖條約中俄分界

自布爾特依山南巴彥梁

庫倫邊境

第一鄂博起向西二十四界點向

東六十三界點每點設立鄂博兩箇標牌為誌其向東六十三界

牌屬於呼倫貝爾者由塔爾巴幹達呼山至額爾古訥河源之向

巴該圖山凡六點

詳見鄂博

同年又於中國沿邊設立卡倫五十九處

呼倫貝爾水陸兩界自察罕敖拉至珠爾特依分設十二卡倫

詳見

卡倫自時厥後俄人擾邊為患稍息而呼倫邊卡防守亦謹嘉慶二

十三年中俄界務曾為一次之會勘迨同治二年中國敗俄於伊

犂俄人越界至孟克西里一帶刈草墾田總管三都克多而濟出

而禁拒收回越墾夾心灘地

庫克多博巴雅斯胡
郎圖溫都爾兩卡間

涉甲午中日戰後光緒二十二年清使李鴻章赴俄賀俄皇尼古

拉斯二世加冕禮是我新敗於日深嘆日本馬關之約要索逾分

而俄秉政大臣老雄偉托野心勃發方挾脅制日本歸還遼東之

大德暗索巨價之報酬機緣湊拍施其敏妙手腕歎我以聯俄之

利益遽訂中俄密約並結後貝加爾赤塔驛連貫烏蘇里鐵路之

契約俄因攫得東清鐵路之敷設權

南滿租界約尚
在二年以後

中國旋命駐

俄大使許景澄與俄訂鐵路合同十二款

條款列後

建築權委諸道勝

銀行另設鐵路公司以為專轄之機關其路線正幹自西伯利亞
赤塔驛起入中國境首由呼倫貝爾南部東西橫貫而滿洲里車
站實當第一要衝次經海拉爾商埠穿西興安嶺山洞出呼倫界
繞江省城南入吉林境而達烏蘇里江路線是為築路之交涉光
緒二十六年拳匪肇禍東三省屈於俄人勢力範圍呼倫一隅權
利任便攘奪無從過問光緒二十八年路工已成時俄人援引築
路合同第六款謂防護鐵路及取用沙石塊石灰等類需地甚夥私
與駐哈爾濱鐵路交涉局總辦周冕商訂展購鐵路附近地畝合
同周冕不察遽與鐵路公司代辦達爾聶會銜簽押其後達爾聶

屢執合同要求實行展地東督拒而未允三十一年冬黑龍江將

軍程德全遣道員宋小濂赴都備顧問將此案始末陳於政府由

外部與俄使璞科第再三確商始允派員會同公司酌量議減三

十三年吉省派道員杜學瀛江省派道員宋小濂與公司總辦霍

爾窪特會議自鐵路合同定後允將周冕所訂合同作廢更訂吉

省展地合同十三條江省展地合同十四條屬於江省者共展地

十一萬一千九百零二畝鐵路實需地六千零九十八畝在外呼倫貝爾計展去四

萬一千九百一十一畝在周冕擅訂展地合同之同年俄人並引築

路合同六款要請鐵路附近煤礦開採權經外部駁令另議惟時

當日俄戰後俄人恃強橫取於沿路各礦肆行採掘呼倫貝爾之

扎蘭諾爾煤礦亦當日強權攫得者也迨三十三年改設行省後外務部以東省鐵路煤礦事件與俄使交涉復將此案交道員杜學瀛宋小濂在哈爾濱與東清公司就近商辦經歲磋商始克定議俄人所享有開礦地段以鐵路兩旁各三十里為界當經訂立

吉江兩省煤礦合同十二條

條文見後

彼此簽押由是鐵路沿線六十

里內之礦山遂以法律形式而入於俄人之手矣又自築路工興所需材木極夥利用沿路森林然率由私取初非指劃地段訂定契約公然授以利權也光緒二十九年由周冕與公司擅訂合同

指定水陸兩路區域凡三段

水路兩段屬吉省界從畧

陸路一段屬江省界

自成吉思汗站至雅克石

一作雅克山

站鐵路兩旁計長六百里寬六

十里屬於呼倫貝爾境內者自雅克石至宜立克都約在三分之一歸鐵路公司自由砍伐迭經江省大吏駁拒以合同未經認可應為無效然俄人恃強侵佔視為己得之產至三十四年始由吉江兩省派員與公司磋商就緒將周冕所訂合同及從前所指地段聲明作廢更立合同由兩省另定森林區域供公司採集材料屬於江省地段均在呼倫貝爾境內曰火燎溝長約三十里寬約十里曰皮洛以各長約三十里寬約十里曰沿杖林河由河溯流而上五十里右岸寬二十里左岸寬十五里劃歸鐵路公司砍伐自此以後吉江境內鐵路附近森林為俄人攫取者不一而足大率由公司購取材料漸變而為箇人營業由中國官廳之授予

漸轉而為私人授予利權所在轉以資敵此不能不致憾於作俑者階之厲也是為改訂合同之交涉宋小濂於三十三年就呼倫副都統之任沿邊墾艾相戒裹足其時適有爭持國界案發生原因俄人在額爾古訥河南岸艾割羊草其草甸面積南北約十里東西約五六十里北臨額爾古訥河攷額爾古訥發源於海拉爾河海拉爾河流至距阿布該圖山十五里許處分而為二一沿東岸流一沿西岸流（西岸水流較東岸水流寬二丈餘）至下游合而為一（即額爾古訥河起點處）中間淤為洲渚產草豐茂確在額爾古訥河南岸中國界內乃移牒俄官嚴重禁阻俄人欲侵佔河洲之地遂以沿西岸之水為支流而指沿東岸之水為正

流謂為兩國交界之處較執草向係在俄國界內而於我擬設卡

倫之阿巴哈依圖山（即阿巴該圖山）

按中俄恰克圖條約以阿巴哈依圖山為兩國

分界之點山在今額爾古納河之西岸依界約單內所載第六十三號鄂博當設於此

反謂侵佔彼界繼

經兩國派員

中國里龍江巡撫周樹模俄國郵木薩爾

會商於齊齊哈爾中國答辯條

文具有充分之理由

條文附後

並有將額爾古納河兩岸二百八十洲

渚中俄劃清之議反覆駁詰遷延未決宣統三年冬季呼倫貝爾

蒙旗獨立此案遂致擱置是為界水之交涉獨立以後邊卡既毀

俄人越界墾麥又復自由行動由俄屯四打拉一曲里海（庫克

多博卡對岸）鄂洛氣屯（吉林林對岸）一帶俄民移住我界

三百餘戶延長三百餘華里寬約五十餘華里大舉耕墾畧無顧

駐海拉爾領事吳薩締復誘惑我蒙旗訂立林礦漁墾地皮各

合同五十餘份

條文見蒙旗復治始末

就合同內容攷之意在舉呼倫全境

利權主權作一網打盡之計民國四年與我訂定中俄呼倫貝爾

條件八條

條件附後

以呼倫貝爾為特別區域由中國節制仍以愚我

蒙旗攘我利權為主旨民國八年蒙旗請願取消特別區域中俄

會訂呼倫貝爾條件明令取消所有根據此項條件之蒙俄合同

各種合同表見蒙旗復治始末

遂亦失其效果九年政府簡任鍾毓督辦善後兼

交涉事宜由蒙署移交前項合同三十餘份次第取消是為契約

之交涉當民國六年三月之際俄國內起革命推翻帝制皇族大

遭殺戮新舊黨亂日熾東省鐵路公司總辦俄人霍爾瓦特乘機

而起圖反革命舉動在中東路線內宣布獨立並自稱全俄政府
總裁於是俄之革命大波由東省鐵路蕩入我國哈爾濱地方一
時道裏道外治安驚擾同時又有駐防中東路伊爾庫次克後備
軍中之下級軍官留金被舉為赤黨

即新黨

首領組織軍士團思欲

奪取路權反對霍氏謂霍係著名舊黨不去霍氏將予新俄政府
以不利我國此時猶認霍為名義較正之俄員加意保護由濱江
縣知事張曾渠募警備隊一營派赴道裏巡邏關營長德山帶隊
過哈留以巡防此為我軍警進入道裏之始並由吉督加派陶旅
長祥貴帶兵三營來哈協助旋以陶為中東路一帶警備司令公

團長培珍為副司令東路沿綫於是均有佈置留金鼓動去霍初

由我曉以國際大義勸其全體解散出境初則佯允繼忽變議定期驅霍我以霍氏要求必須武力壓迫遂由陶公兩司令派兵將增合留金之俄軍隊解除武裝留金亂事由我解決霍復大事活動謀反革命野心未已潛招俄軍并募華蒙人為兵與普利士廓夫組織政府及救國會義勇團等名目以謝米諾夫為前敵司令

赴西比利亞與新黨接仗

在七年五月間

利用原有俄軍警自稱鐵路界

內總長官發佈公告我與抗議無效且擅挪公款供其政爭活動積欠工資俄工憤激全體罷工誓去霍氏我當局亦以不去霍氏亂源未已遂以東省鐵路督辦名義照會霍氏去職霍以環境所迫不能戀棧鐵路總辦名義遂以取消自此風潮發後當局知非

一律解除武裝不足以遏亂萌於沿路軍警無論俄新黨舊黨概予解除武器俄軍警亦均俯首帖服軒然大波一朝敕定在民國六七年之交護路責任由吉黑二省分擔各就界內設置警備司令吉省設置既如上述黑省東路所經路線自滿洲里起至哈爾濱之北對青山止歷二十三站計長一千六百餘里於七年二月由黑省鮑督軍責卿設置護路警備司令部以張參謀長煥相為總司令張明九張奎武為左右副司令八年經監管會議決中東鐵路完全由我擔任保護乃由吉省鮑督軍兼任護路總司令以哈爾濱為中心點分哈滿哈綏哈長三路各置司令一員嗣後編制雖有變更然大體無甚出入並經張總司令煥相於呼倫貝爾

邊境八十六號小站設軍事檢查處朱將軍慶瀾定綏站俄黨難民請求入境辦法十條從先後由哈滿哈綏兩路運送俄黨敗軍資遣回國解除武裝者一為謝米諾夫之敗軍退至滿洲里運往綏站出境一為斯莫林之敗軍退至綏芬河運由滿洲里出境路界內之軍權既由我主張布置而往日所喪失之警察司法市政各權亦復次第收回屬於警察者民國七年二月因俄新舊黨在我境內活動政爭始有臨時警察局之組設在路界內與俄警分區維持治安九年霍爾瓦特被逐後由內務部頒布東省特別區警察大綱從依據大綱復頒布警察總管理處組織章程從依是改臨時警察局為東省特區警察管理處規定由哈爾濱沿中東鐵路南至長春北至滿洲里站東至綏芬河站概為東省特別區警察管理處施行警察權之區域就

全區域畫分五區以為管轄地點以哈爾濱道裏及附近八站三十六棚秦家

岡馬家溝香坊顧香屯等處為第一區由哈爾濱車站至長春車站為第

二區由哈爾濱向東至綏芬河即五站為第三區由哈爾濱向北至克渡河為

第四區由海拉爾至滿洲里為第五區十年四月復設中東鐵路警處頒

布路警處組織大綱從闕中東路全綫各站路警統歸該處節制於哈埠設

四區分沿路綫為六段滿洲里為第三段海拉爾為第三段第五分段路警

處又定有路警暫行護車章程從闕屬於司法者自民國九年停止俄使領待

過後司法部提議收回俄國法院閣議通過派張司法次一鵬至中東沿路

調查視察繼派殷汝熊為籌備接收主任一面頒布東省特別區法院編

制條例從闕及甄拔特種司法人員章程從闕並任外國諮議等章程從闕俄國

法院卷宗於十一月十日由殷主任接收報部而高等及地方審判廳並地方分庭復次第設立計哈爾濱設高等審判廳地方審判廳各一處沿鐵路線設地方分庭六處海拉爾為第五分庭滿洲里站為第六分庭專理鐵路界內關涉俄人訴訟案件凡新民刑案件終審機關悉照我國現行律辦理其屬於市政者按中東路界內俄人攫取行政權華商大為反對數四交涉僅訂自治大綱十八條從約以一箇月再訂公議會及租放地畝地丁警察各項章程乃屢經延宕未果並核奪公議會議決事件之鐵路總辦亦久不簡派自庚子許景澄遇害後至民國六年始行特派改稱督辦俄人乘隙蹈瑕遂根據其單獨擅訂之民政處大綱於民國元年發布自治會詳章將該

會隸屬於鐵路管理局之民政處下加以監督一面又與英國協定條約莫彼詳章永存有效藉以鞏固其殖民政策歷史如此把持可知今幸有挽回之機我苟從根本糾正按照光緒三十一年中日滿洲善後附約開放哈爾濱寧古塔琿春三姓齊齊哈爾海拉爾瑗琿滿洲里為商埠之條文查照自闕商埠章程從新改組在我大權不至旁落在列國咸受通商利益斷無違言即英亦難出而抗議乃我當局慎重太過以英俄協約關係恐惹起國際交涉僅於十年二月設立東省特別區市政管理局置正副局長二員就各處舊有之鐵路交涉局設市政分局由內務部頒布市政管理局章程英俄協約繼續履行國家主權甘於放棄嗣經我國

議員全體退席力爭挽救卒無效果至今自治公會依然為鐵路

附屬機關名存實亡不無遺憾又在俄新舊黨水火激烈之際勞

農政府第一次向我宣言

民國八年

對中東鐵路更特別聲明一概無

條件交還中國嗣於九年二月新俄外交代表喀拉岑又通牒我

外交部宣佈所有俄國各從前政府與中國所定各條約為無效

放棄中國領土之侵佔及在中國境內各租界並將從前俄帝國

政府及中級社會人士所掠奪者俱以無報酬永遠還付中國新

俄外交總長卡那康又自伊爾庫次克省致我外交部通牒

宣言書通

牒均從闕

復重言聲明廣義政府願將中國中東鐵路及租讓之一切

礦產森林金礦及他種產業由俄皇政府與克倫斯基政府及謝

米諾夫郭爾恰克等賊徒與從前俄國軍官商人及資本家等侵佔得來者一概無條件歸還中國云云並恐前項宣言通牒等他國中途截留不能達到特派代表賚送中國請本宣言及通牒主旨另訂通商條約此時我外交當局所持方策若以廣義政府為有誠意則就彼三次宣言為澈底的磋商謀根本之解決所謂前俄帝國時代政治經濟的種種侵略一掃而空我之所得夫豈在鮮否則認廣義政府之宣言猶未能斷定為有代表俄國之能力不遽與開談判則此中俄兩國合辦之東省鐵路一方之主體消滅一方存在之主體應出而為全權之主持以維持其既成之局即此東省鐵路完全移歸中國管理不但名正言順抑亦情允理

當乃不即出此竟與以經理名義不能為契約主體之道勝銀行

締結管理東省鐵路續訂合同天與不取坐失事機殊為可惜自當

民國六年三月之際白起至此節錄最近十年中俄交涉鍾督辦任事之時中東路權已完全

歸我管領沿邊沿路避難俄僑來者日夥在我邊防政策以人道

主義不得不由限制攘斥一變而為保護管理九年四月十一日

日本駐海拉爾隊官認為鐵路從業員有激黨分子逕行逮捕八

人擬即解滿督辦鍾毓鎮守使張奎武以主權所在向日隊官交

涉引渡正開議間偵捷克軍捷軍舊為奧屬欲脫奧專制故俾於俄駐軍威埠嗣經列國承認於捷在

奧原領土內劃出一部自成新邦歸國過埠憤與日人衝突激成混擊雙方互有

死傷捕獲逸去我國兵民亦被誤斃八人鍾毓據理向日捷兩方

調停日本突由滿洲里調來聯隊分據山隘限期作戰聲勢洶洶
市面驚慌鍾毓見事危急隻身闖入日軍戰線力與交涉約同日
提兩軍代表集議和解結果由提軍讓步日兵撤滿嗣由日提議
調查海站衝突事實中日提三方各派委員長

中國鍾毓日本石坂少將提克中校

諾瓦會議於哈爾濱中國提出宣言三項極為確實公平議未終

結提代表以不滿意退席案遂中止是為挽回主權之交涉是年
十一月俄舊黨謝米諾夫敗退滿站地方我國慮其竄擾邊境勒
令繳械爾時俄黨戰爭劇烈西比利亞與中東路兩線久矣遮斷
交通繼為救濟旅俄華僑及德奧俘虜起見開議局部通商俄亦
急求互市遂於十一年三月由黑龍江官府派交涉員鍾毓與赤

塔政府所派交通次長瓦連勒夫拉基米羅維赤亮賓克夫協定

暫時開通邊界條件及開通車輛條件

條文
附後

並於中國國界八十

六號小站地方

滿洲
里北

設軍事檢查處以遏亂萌東赤兩路於是相

接通車是為交通之文涉廷恒受事於沿邊越墾土地一律改招

華人承種以免將來土地之驟葛孟克西里等卡俄人越界刈草

一案並經迭向赤俄代表坡霍瓦林斯基鄭重文涉此案談判在

彼堅以齊齊哈爾商定未及實行之案為依據指刈草沙灘為彼

有在我則以該案未經兩國政府批准並未及約期測勘會立界

碑缺欠兩種手續不能認為有效抗議終以暫泯刈草爭端不涉

邊界問題由彼允認立據欠稅將來劃分國界此亦可為佐證之

一端蒙俄合同則繼續取消別羅克雷洛夫庫子聶錯夫之漁業
兩起葛羅火夫斯克之礦業一起其間惟瓦大果夫之貝爾湖漁
業合同謝夫謙克之叔東溝巧溝五奴爾溝等三處森林合同不
惟狡抗不繳而居心叵測反假日人參加投資為抵抗引起駐江
日領無理干涉經省長吳公俊理再三駁拒迄未解決嗣於席伯
洛夫四犯勾通巴龍謀亂案內事連瓦大果夫謝夫謙克助匪有

據在席犯身畔搜獲瓦致謝函託其招待俄匪幫助進行等語遂由廷恆先後將三犯捕獲解

省並由省署派員在該林場起獲槍枝炸彈私藏軍火情事兩合
同由是同時均歸無效結果貝爾湖漁業由省署派員接收叔東
溝等三處森林由省署派政務廳長史紀常商同駐奉日總領事

赤塚正助南滿公所所長鎌田彌助就原有林場改組中日俄合
辦札免採木公司另訂協定書辦法大綱及札免採木公司合同
各條條文
見後兩案於是完全結束而察罕敖拉煤礦合同由義商別
力諾與蒙署所訂開採多年亦復迭經磋商始得以金盧布十四
萬八千元購歸廣信公司承辦並繳合同歷考呼倫貝爾交涉情
形地鄰俄界對外政策亦惟與俄相周旋在路約未結以前侵擾
問題重在沿邊自軌道駛入鐵路侵畧政策實現內地因應對待
則又兼在沿路最近接觸繁劇日滋海滿兩埠實與沿邊水陸界
同為至要關鍵而沿邊沿路一帶之土地林木礦產墾植為他族
所垂涎所染指者尤足動吾人以門戶洞開臥榻新睡之警悚前

車可鑿來軫方道主權利權是又不得不特別注視者也

交涉事項各條文依次附載於左

尼布楚條約

(一) 將自此流入黑龍江之綽爾納一作斡爾那雅即烏魯木一作烏倫穆

河附近之格爾畢齊河為界沿此河口之外興安嶺一作在大興安嶺

至海凡嶺陽流入黑龍江之河道悉屬中國其嶺陰河道

悉屬俄羅斯惟烏地河以南興安嶺以北中間所有地方河

道暫行存放俟各還國察明後或遣使或行文再行定議

(二) 將流入黑龍江之額爾古訥河為界南岸屬中國北岸屬

俄羅斯其南岸星里克河口現存俄羅斯盧舍著徙於北岸

(三) 雅克薩地方俄羅斯所築城垣盡行拆毀居民諸物悉行撤回察罕汗處

(四) 分定疆界兩國獵戶不得越過如有一二宵小私行越境打牲偷竊者拏送該管官分別輕重治罪此外十人或十五人合夥執仗殺人劫物者務必奏聞即行正法其一二人誤犯者兩國照常和好不得擅動征伐

(五) 除從前一切舊事不議外中國現有之俄羅斯人及俄羅斯國現有之中國人免其互相索還著即存留

(六) 兩國既永遠和好嗣後往來行旅如有路票聽其交易

(七) 自會盟日起逋逃者不得收納拏獲送還

(八)兩國大臣相會議定永遠和好之處奉行不得違誤

此條約成立後中國所失之地甚鉅一為外興安嶺以北

地為地河以南雖定為兩國共有之地其後中俄恰一為
克圖條約復經規定然此地久為俄人所侵佔矣

額爾古訥河以西地就中厄布楚尤為重要
以後璦琿天津北京各條

約均與呼倫
無關從闕

東省鐵路公司合同十二款

駐俄大臣許景澄奉光緒二十二年七月二十日旨允准與華俄道

勝銀行訂定建造經理東省鐵路合同

中國政府現以庫平銀五百萬兩入股與華俄道勝銀行合夥開

設生意盈虧均照股攤認其詳細章程另有合同載明

中國政府現定建築鐵路與俄之赤塔城及南烏蘇里河之鐵路兩面相接所有建造經理一切事宜派委華俄道勝銀行承辦所有條款列後

第一款 華俄道勝銀行建造經理此鐵路另立一公司名曰中國東省鐵路公司該公司應用之鈐記由中國政府刊發該公司章程應照俄國鐵路成規一律辦理所有股票祇准華俄商民購買該公司總辦由中國政府選派其公費應由該公司籌給該總辦可在京都居住其專責在隨時查察該銀行暨鐵路公司於中國政府所委辦之事是否實力奉行至該銀行暨該公司所有與中國政府及京外各官交涉事宜亦歸該總辦經

理該銀行與中國政府往來賬目該總辦亦隨時查核銀行應
專派經手人在京都居住以期一切事宜就近商辦

查此條及諸條所稱政府字樣洋文係作古威勒芒即近來
譯為國家之稱又所謂總辦字樣洋文係作伯理璽天德亦

有總辦之義而名目較大西語無論公署商會其首領人皆稱為伯理璽天德譯者以此稱專

屬民主甚誤以所譯與洋文無甚出入故皆仍之其原譯新俸字

樣現改公費措詞較為得體

第二款 凡勘定該鐵路方向之事應由中國政府所派之總辦

酌派委員同該公司之營造司暨鐵路所經之地方官和衷辦

理惟勘定之路所有廬墓村莊城市皆須設法繞越

第三款 自此合同批准之日起十二個月為限該公司應將鐵路開工並自鐵路勘定及所需地段給與該公司經理之日起以六年為限所有鐵路應全行告竣至鐵軌之寬窄應與俄國鐵軌一律即俄尺五幅地約合中國四尺二寸半

第四款 中國政府諭令各該管地方官凡該公司建造鐵路需用料件僱覓工人及水陸轉運之舟車夫馬並需用糧草等事皆須盡力相助各按市價由該公司自行籌款給發其轉運各事仍應隨時由中國政府設法使其便捷

第五款 凡該鐵路及鐵路所用之人皆由中國政府設法保護至於經理鐵路等事需用華洋人役皆准該公司因便僱覓所

有鐵路地段命盜詞訟等事由地方官照約辦理

第六款 凡該公司建造經理防護鐵路所必需之地又於鐵路附近開採沙土石塊石灰等項所需之地若係官地由中國政府給與不納地價若係民地按照市價或一次繳清或按年向地主納租由該公司自行籌款付給凡該公司之地段一概不納地稅由該公司一手經理准其建造各種房屋工程並設立電線自行經理專為鐵路之用除開出礦苗處所另議辦法外凡該公司之進項如轉運搭客貨物所得票價並電報進款等項俱免納一切稅釐

第七款 凡該公司建造修理鐵路所需料件應免納各項稅釐

查此條定議時該法文修理下尚有經理字樣據稅務司柯樂德稱當時李相謂與本條修理語意重複因將原譯漢文刪去經理二字然非有故駁改未令將法文並刪故漢文微有詳略等語合併聲明

第八款 凡俄國水陸各軍及軍械過境由俄國轉運經此鐵路者應責成該公司逕行運送出境除轉運時或必須沿途暫停外不得借故中途逗遛

第九款 凡外國搭客經此鐵路概於中途入內地必須持有中國護照方准前往若無中國護照責成該公司一概不准擅入內地

第十款 凡有貨物行李由俄國經此鐵路仍入俄國地界者免
納一概稅釐惟此項貨物除隨身行李外該公司應另裝車輛
在入中國邊界之時由該處稅關封固至出境時仍由稅關查
明所有書記並未拆動方准放行如查出中途私行開拆應將
該貨入官至貨物由俄國經此鐵路運往中國或由中國經此
鐵路運赴俄國者應照各國通商稅則分別交納出口進口正
稅惟此稅較之稅則所載之數減三分之一交納若運往內地
仍應交納子口稅即所完正稅之半子稅完清後凡遇關卡概
不重徵若不納子稅則逢關納稅遇卡抽釐中國應在此鐵路
交界兩處各設稅關

第十一款 凡搭客票價貨物運費及裝卸貨物之價概由該公司自行核定但中國所有因公文書信函該公司例應運送不須給費至運送中國水陸各軍及一切軍械該公司祇收半價

第十二款 自該公司路成開車之日起以八十年為限所有鐵路所得利益全歸公司專得如有虧折該公司亦須自行彌補

中國政府不能作保八十年限滿之日所有鐵路及鐵路一切產業全歸中國政府毋庸給償又從開車之日起三十六年後中國政府有權可給償收回按計所用本銀並因此路所欠債項並利息照數償還其公司所賺之利除分給各股人外如有盈餘應作為已歸之本在收回路價內扣除中國政府應將償

款付存俄國國家銀行然後收管此路路成之日由該公司呈繳中國政府庫平銀五百萬兩

查此條給價收回一節因恐將來講解有異復商該總辦另繕憑函附於合同之後以期相信

附件

照譯華俄銀行總辦羅啓泰來函

啟者本公司賬目按年結算刊布其中載明各項賬目及一歲出入款項並所欠之債所借之款還本付息等情將來中國給價收回此路應以每年結算刊布之賬為憑其收回緣由詳載公司章程之內

光緒二十二年七月二十五日

俄曆一千八百九十六年九月五日

吉林省東清鐵路煤礦合同

第一條 中國東省鐵路公司有在吉林省議定界內勘挖煤

礦之權其開挖應在何處應用何法均由該鐵路公司自擇惟

勘礦之時仍須會同華官前往驗明實在無礙方准勘辦所謂

礙者係指離民居或墳墓遠近而言如有市場之處所開礦口

不得在二里以內如不過十家之鄉村礦口相距不得在一里

內如有大墳地或森林礦口相距不得在半里內

第二條 鐵路路線兩旁三十華里內之煤礦由公司勘辦但中

國民人亦可享在該路兩旁三十里內挖採煤斤之利益祇要
於該公司已開煤礦無礙該公司不得攔阻或有他項洋人或
華洋合股在三十里內挖煤應商准華官及該公司方能辦理
其路線三十華里以外與該公司無涉無論華洋人等勸挖煤
礦准否應由華官自主該公司不得過問欲在三十里外勸挖
煤礦仍須先稟准本省巡撫方可施行亦與各項華洋人等無
異

第三條 鐵路公司自開之煤左近居民日用不妨可至煤窯價
買煤斤惟各處情形不同價值自難一律某處何價均應由哈
爾濱鐵路公司酌定開單通示一面知會哈爾濱交涉局亦行

通示華民

第四條 如遇尋得煤苗之處或房子三五所或小塊墳塋不過十墳之塋地而其必須為應用則鐵路公司可向地主房主商酌移房移葬等事價值派交涉員秉公商定妥辦隨時稟明本省巡撫立案

第五條 凡勘明某處實可開挖煤礦應需地段若干由公司會同交涉員向業主查看地勢公平議價或租或買即准開辦其勘採不用之地應由該公司出資填平交還原業主該公司無地面業主之權若有損傷樹木及踐毀禾苗之處亦由該公司會同交涉員向業主和平議價償給

第六條 煤礦應需木料在購定界內者由公司隨意砍伐如在
界外民地應與地主和平議價按照與公司所定木植章程辦
理其官地辦法亦須按照本植章程辦理

第七條 開出之煤每千斤鐵路公司交納^吉江省平銀一錢二分

每年分四季交納第一次俄三月底第二次俄六月底第三次

俄九月底第四次俄十二月底又每座出煤窯洞每年交納山

課^吉江省平銀十七兩六錢四分此項山課俄六月底一次交清

第八條 凡係官地亦須會同華官勘明劃定界址由公司議定

租價惟須比照墾荒按等文納不得或過

第九條 鐵路公司與該處中國官家或華民有尚未商定事件

將來就地高議不合之事均歸哈爾濱鐵路交涉總局查核定

辦

第十條 以上章程係專為鐵路公司自開之礦而定其華人自辦之礦無論新舊無論何處均仍照中國各章辦理鐵路毫無干預

第十一條 本合同應用華俄文繕寫二份核對如遇辯論以華文為憑

第十二條

公司所辦各礦由

吉林
黑龍江

省交涉局派員駐廠稽查

出煤若干會同該礦辦事俄人登簿記數委員駐房由公司預備該廠必須指定地段或圈一圍牆以內巡警不可攔入倘有

犯事華人逃匿礦界內應隨時由地方官知照廠員派人協同
中國巡警前往查拿

華曆光緒三十三年七月二十二日
俄曆一千九百零七年八月十七日
立於哈爾濱

齊齊哈爾會議中國答辯條文
清宣統三年

(一)原約界單內所載額爾古訥河之右岸正對海拉爾河口
在阿巴哈依圖嶺凸出處設立第六十三號鄂博可證

(二)第六十三號鄂博原約既載明在阿巴哈依圖嶺之凸出

處並載明在額爾古訥河右岸是約內所載額爾古訥河最
高處之阿巴哈依圖嶺既現在額爾古訥河左岸之阿巴哈
依圖山並無兩箇阿巴哈依圖也

(三)俄人所指達賚諾爾湖

即呼倫湖

為額爾古訥河源未免有誤

證據如左

(子)自達賚諾爾湖至額爾古訥河相距甚遠距海拉爾河口

亦甚遠中間之小河名達蘭鄂羅木並不名額爾古訥

(丑)此河每逢夏天旱其流甚為細小且有乾涸之時

(寅)此河之水由海拉爾河流出向南偏西流入湖中並非流

入額爾古訥河

(卯)此河各水既南流入湖並非湖水北流入河即不得指為

額爾古訥河源

(四)原約界單內載額爾古訥河之右岸正對海拉爾河口在

阿巴哈依嶺凸出處設立第六十三號鄂博既曰河之右岸則阿巴哈依嶺凸出處必貼近額爾古訥河而額爾古訥河亦即在山脚下為起點斷無中隔一河另尋河岸之理此處之河必應以此趨一支為額爾古訥河其餘旁汊小港及水勢別向者均不得誤稱為額爾古訥河

(五)額爾古訥河有東西兩山西山自河面起高十一丈東山自河面起高十四丈五尺東山高於西山者三丈五尺則東山自係額爾古訥之最高處况原約鄂博單內第十五俄國卡倫今在額爾古訥河旁貼近鄂博並對海拉爾河之中間在阿巴哈依嶺之凸出處居住現在俄國阿巴哈依圖屯即

在此山以此貼近尤足證此山為中俄國界

中日提哈爾濱會議中國提出三項宣言 民國十年

(一) 日軍在中國領土內擅自逮捕俄人為肇事之原因

(二) 俄人因被捕憤激致引起相互之混擊是為本案之真象

(三) 中國有地主關係為息事保安起見屢次出為調停決無左袒見的思想各方面均能諒解

中華民國黑龍江省官府遠東共和國政府協定開通邊界條件
第一條 邊界往來及鐵路交通為中華民國黑龍江省與遠東
共和國毗連關係故此次商訂開通邊界問題僅係上述兩方
之關係不與國際通商問題相涉

第二條 凡遠東共和國人民進入中華民國國境如經中國邊界官員查明其人含有過激意味又如俄人所運物品或印刷物等意在宣傳過激主義之用者一概禁止其入境其未經邊界官員查出而運往中華民國國境之過激印刷物及其他項過激物品均不得在中國流通

第三條 俄國旅居中華民國領土之人民不得為任何政治之鼓吹即此種鼓吹行為與中國社會不能相容並反對中國政治及社會組織者

第四條 遠東共和國政府應擔保護旅居遠東共和國之中華民國人民生命財產之安全並予以特別利益之待遇

第五條 中華民國人民在遠東共和國領土內所受之種種不幸事件遠東共和國政府應秉公處理並設法禁止此種事件之重行發生

第六條 俄國在滿站之前札拜喀爾稅關及鐵路即今之赤塔鐵路所有之工匠地包及其他附屬之鐵路用品材料建築物等項依照本件協定之效力應於特定期限內撤出中華民國境界（在末撤出之前赤塔鐵路得臨時使用行車正當必需之物品）赤塔鐵路管理權不得超越八十六號小站惟稅關郵局殖民局產業應照停止前俄帝國領事待遇案暫由中國政府保管

第七條 中國人民持有中華民國官憲所發護照由遠東共和國回國遠東共和國政府不得禁止攜帶銀貨幣及各種皮張出口但運出大宗五金並貴重物品須先行報明遠東政府指定之官署備案惟指定此項官署之命令公布不得逾本約批准後兩星期又華商在遠東共和國營運進出口貨物所納稅不得超過俄商在中國所納進出口貨物之稅數

第八條 遠東共和國旅居中華民國領土內之人民與中華民國旅居遠東共和國領土內之人民享受同等之權利

第九條 中華民國官憲不應在其領土內協助反對遠東共和國政府之俄人遠東共和國各官憲亦不應在本國領土內協

助反對中華民國政治之中國人

第十條 旅居遠東共和國領土內之華人不得協助反對遠東共和國現行政府之俄人但遠東共和國政府對於華人及其有關係之俄民未經證明事實之前不得藉口華人有護庇反對人之行為故意搜索及侵害

第十一條 旅居遠東共和國之華民不得假個人名義代遠東共和國人民輸出金銀皮張但旅居華民以交易所得或其他合法購置有相當根據者運輸回國時遠東共和國政府不得藉詞指為代遠東共和國人民輸出而扣留之

第十二條 中華民國人民得自由赴遠東共和國國境內須持

有中國官廳護照經俄國官吏簽證者遠東共和國人民得自由赴中華民國境內須持有遠東共和國外交部或外交部委定之一省最高官署護照經中國駐在領事館簽證者各受入境國之邊界官吏正當檢查如無違禁物品均准入境但從前所有過江小票及入境居留等^票捐費一概廢除惟長久居住須持有本條所規定之護照

以上議定各條以中俄文字雙方校對無誤各繕寫二份如有爭議及條文上之解釋應參照雙方條文為適中之意義解釋中俄委員簽定後俟

中華民國黑龍江省官府
遠東共和國政府
互相批准^即由雙方各保存一份一面宣

佈各本國人民遵守實行

中華民國十年三月七日
訂於滿洲里
遠東共和國西曆一千九百二十一年三月七日

按右列條件中俄兩方各有不滿意之點在我於第十二條經
俄官吏簽註及長久居住兩端在俄於第六條稅關郵局一節
各持理由擬待交互修改

會訂東赤兩路開通車輛條件

第一條 赤滿通車依第四條所定限期内由赤路開至滿站為
止兩路車在滿站交換運貨

第二條 為救濟在遠東共和國華僑及德奧俘虜起見先定開
貨車交通每星期暫通往返貨車各二次客車各一次每次押

送貨車不得過二十人

第三條 在八十六號小站地方中國設軍事檢查處並由交涉署派員協助辦理

第四條 滿站札省地包水樓工匠及其他附屬之鐵路材料建築物等項限於自一千九百二十一年五月一日起（因五月地凍融化始能工作）至一千九百二十一年十一月一日為六個月期滿即須著手迅速連續遷出但無論如何至遲不得逾三個月遷竣

第五條 滿站地包工廠於借使期間由赤路派總管管理由東路派員充任幫辦所有一切費用由赤塔鐵路照支薪工由東

路所派之員監督發放

第六條 赤路車輛於所借之廠期內在滿站裝卸載後仍須開回俄境不得在滿久留

第七條 赤省站務經理售票一切掛車事宜由東路站長兼任經費開支由赤路擔任滿站路務赤塔鐵路不得干涉

第八條 電報房機器由東路人員代辦由赤路出給津貼

第九條 從前在滿扣留之扎路車頭車輛於未開車前應由東路赤路各派代表會同鍾督辦按現存實數調查明確開車第一日先撥給一半餘俟報明中東鐵路督辦核示辦理至在東路其他各站所有之扎路車頭車輛應由東路迅速查明確數

遠東共和國各路現存之東路車頭車輛亦應由遠東政府會同東路委員速即查明雙方結清

第十條 在滿札路不用之職員工入並東路解僱之職員工入可先行運回札省

第十一條 掛車辦法售票價目可依照東路與南滿接運辦法辦理

第十二條 赤路在滿之職員工入辦守中國政府法律命令並由中國官府派軍警官兵監視保護

第十三條 西曆一千九百二十一年三月八日正午十二鐘定為貨車開行之第一日

中華民國十年三月七日
訂於滿洲里
遠東共和國西曆一千九百二十一年三月七日

協定扎免採木公司辦法大綱

(一) 本公司係中日俄三國合辦依中國法令組成之中國方面以黑龍江省實業廳為代表日本以南滿鐵道會社為代表俄國以謝夫謙克商會為代表

(二) 本公司經營採伐中國黑龍江省扎敦河免渡河原圖並新添之五十方里地域

原圖稱甲
新圖稱乙

內之木植及其他附屬事業

但該地域內如有山產礦產發現本公司欲經營此項事業時須遵照中國所定法令章則辦理

(三) 本公司資本金定為大洋六百萬元其出資方法另以萬金

帳定之每年所得純利中日俄三方均分

(二) 本公司營業期限定為三十年如欲展限須經中國政府之許可

(三) 本公司設立理事長一員理事二員理事長由黑龍江政府派充理事二員由日俄兩方各派一員

(四) 本公司為純謀利益起見所用辦事人員務須察看營業狀況繁簡斟酌委用以節冗濫為要

(五) 本公司辦事技術人員中日俄三國合用之但工人概用中國人

(六) 保護林場應用軍警由理事長理事斟酌地段情形需用多

寡呈由省政府分派駐守其經費按月由公司繳納

(二) 本公司應遵照中國國家並江省政府之法令章則及地方之慣例繳納一切課賦稅捐

(三) 本公司應於歲獲贏利項下對於江省政府年納十分之一報效金

(三) 本公司從前各項關係另行商定處理

(三) 本協定詳細辦法於協定書簽字後一個月內於哈埠另行商訂

附則

本公司開辦後應用活動資本由日俄兩方面籌集黑龍江省

政府但分贏利其有虧折不認分擔至營業上一切事項均由
日俄兩方計畫進行以期公司日益發達

本協定書單日俄文字各繕三份中日俄三方各執一份為證

中華民國十一年四月初四日
日本大正十一年四月初四日 訂於奉天

俄曆一千九百二十二年四月初四日

扎免採木公司萬金帳

黑龍江省以原圖地上地下並增加地域五十方里之林區及
地上地下為資本（大洋銀二百萬元正）

謝夫謙克商會以所設施者為資本如建築物鐵道等物（大
洋銀二百萬元正）

南滿鐵道會社以現在所投入之資為資本（大洋銀二百萬元整）

扎免採木公司合同

黑龍江省實業廳（以下稱甲）代表張星榆南滿鐵道株式會社（以下稱乙）代表人江正太郎及謝夫謙克兄弟商會（以下稱丙）巴特利克謝夫謙克根據西曆一千九百二十二年（即中華民國十一年日本大正十一年）四月四日在奉天所協定扎免採木公司辦法大綱之意旨關於該公司之設立訂定合同如左

第一條 本公司依協定大綱在中國黑龍江省扎敦河免渡河

原圖地域（甲圖）並新添五十方里地域（將來製成之新圖稱乙圖）內採伐樹木及經營關於木材上之附屬事業
在前項甲圖地域必要地點由甲乙丙三方派人會同設立標
樁其新添五十方里林區於本合同蓋印後由黑龍江省政府
（以下稱省政府）在甲圖境界外指定地域後務期從速測
量會同設立標樁

第二條 本公司有查探所定地域內之山產地產並其經營之
特權但於此時遵守中國法令章則辦理

第三條 本公司有哈爾濱設總局於林區內設林區事務所此
外本公司得於必要地點設立支店派出所或代理店

第四條 本公司於所定地域內得將鐵道自由撤去或建設以資運用又應業務上之必要報經當地官憲之許可得開設各種工廠及木材存置場貨物倉庫等並為謀事業發達起見得為各種必要之設施

第五條 對於第三者本公司甲乙丙各以其出資之限度擔負責任

第六條 本公司之資產及一切收支各計算均以中國之現大洋為本位又會計年度於每年十月一日開始至次年九月三十日終了

第七條 本公司於每年決算時所獲贏利以其十分之一為報

效金交納省政府其純利由甲乙丙三方均分之

前項所稱之贏利由總收入內扣除關於營業之一切經常並
臨時費各動產並不動產之損耗填補金及前年度結算缺損
額而言所稱之純利由前記贏利內扣除報效金及各公積金
賞與金之餘額而言

第八條 本公司開辦後應用活動資本由乙丙兩方任籌集之
責甲不負出資責任其有虧折亦不認分擔

第九條 本公司理事長總理公司一切事務理事二名會同理
事長處理公司一切事務其關於營業上之事項由理事二名
計畫進行

理事長及理事有事故時指定代理人使之執行其職務

第十條 理事長及理事組織理事會為本公司決議執行機關
其決議除特在理事會必須由三方合意所定事項外餘均取
決多數

第十一條 甲乙丙豫先知照理事會得隨時委員監查公司之
業務檢查金庫賬簿及各種文書但委員之川資旅費毋庸本
公司擔負

第十二條 本公司依協定大綱之規定在江省境內應按原價
百分之二十一元八角繳納出產木稅至地方附加各捐應遵
照當地徵收慣例繳納其海關及省外應納各稅捐不在此列

前項稅捐於木材輸出林場繳納之

第十三條 關於平時保護林場之巡警其人數由理事長呈請省政府分派駐守如巡警中有不聽指揮及不稱職者並得由理事長呈請省政府撤換之

本公司對於前項巡警除供給服裝宿舍暨辦公費並繳納子彈之損耗費外每月負擔一定俸給

遇有非常變故時為保護起見理事長得向省政府聲請派遣軍隊

依照前項本公司對於聲請駐防期間內之軍隊所需糧秣由公司支付辦理

第十四條 本公司於本合同蓋印同時成立並於成立後一個月內將從前各項關係處理明確開始營業

第十五條 本公司存立期間自本合同蓋印之日起以三十年為限至限滿後非經中國政府之許可不得繼續辦理

第十六條 本公司於每年九月末日以前編造次年度之事業計畫書及收支預算書於年度終了後作成該年度內一切事業及營業報告書并收支計算書經由理事長報告於甲乙丙三方查核之

第十七條 本公司辦事及技術人員之任免賞罰等以理事長名義行之

第十八條 關於本公司地域內一切行政事宜應由該管地方
長官監督管理

第十九條 省政府俟本公司成立一年後一切事務整頓妥協
體察情形得將甲一方面招商承辦

第二十條 本公司對於省長行文用呈對於其他地方長官用
公函均以理事長名義行之

第二十一條 本公司之章程及辦事細則根據協定大綱及本
合同意旨由理事會另定之

第二十二條 本合同以中日俄三國文字各作成三分甲乙丙
署名蓋印後各執一份為證本合同由省政府依中國法令呈

請中央政府核準備案

中華民國十一年六月二十五日
日本大正十一年六月二十五日
訂於齊齊哈爾

俄曆一千九百二十二年六月二十五日



